



宋宰輔編年錄卷之十九

宋太常博士徐自明著

光宗淳熙十六年 己酉 用實錄修

三月甲寅前宰相史浩授太師自太師使致仕魏寧軍節度

師依前官致仕

制曰朕欽承內禪之丕基寅紹中天之景運行慶施
惠方布令以惟新褒德錄賢在疏恩而宜渥眷時元
老歷事三朝蓋揖遜之再逢蓋優崇之特異誕敷顯
冊播告昕廷具官史浩忠肅而惠和寬闕而溫厚皇圖首
翊獨高夾日之功揆路荐登深慰作霖之望功成身

退德邵年高惟其盤舊學之臣既尊榮之莫及邁郭
令中書之考豈壽祉之可量肆是纂圖尤深注想敬
遵慈訓用舉徽章峻陞論道之班俾正維師之位寵
仍兼於制閫禮益厚於垂車併衍真祖式昭異數於
戲天下大器念付託之匪輕舊德元龜方諮諏之是
急諒不忘於王室必樂告於爾猷尚罄厥誠以荅殊
遇

光宗自乾道七年二月癸丑自恭王立爲皇太
子淳熙十六年二月壬戌孝宗詔禪位上卽帝
位三月甲寅太傅保寧軍節度使致仕浩授太

師上旣卽位詔求讜論令學士院降詔卿被遇
壽皇亶爲舊學出入將相宣勞二紀當今耆艾
孰踰卿者其悉條以上副朕傾渴之意公封事
數千言皆當世要務孝宗移御重華宮以宴處
清閑思見舊學上爲頒詔諭賜御劄紹熙二年
二月遣御藥楊舜卿撫問趣行初重華之召浩
引辭甚切孝宗諭曰今與卿皆閑人當衣褐見
何必求免耶詔乘肩輿入隔門仍命孫定之扶
掖特改京官朝退次詣重華孝宗從容謂浩曰
與卿復得相見旣無嫌疑足可爲度歲計毋亟

言歸又顧浩曰卿輔朕初潛親遇朕建朱邸陞儲宮登大寶兩居相位三入經帷逮今三十餘年君臣相得殆非他人比也再對奏陛下召臣非徒使霑被寵光亦欲少裨繼明之治敢為四說以獻曰立天下之大本平天下之隱難收天下之人望伸天下之直氣謂教皇子備夷狄舉人才受盡言也上垂聽獎諭再三五年四月五日薨年八十九計聞孝宗及上震悼賻贈有加詔太師浩身居極品又係至尊潛藩舊學贈恤之典禮宜優異特追封會稽郡王寧宗皇帝登

極賜謚文惠御書純誠厚德元老之碑以賜焉

詔翰林學士樓鑰狀其行

五月甲午王藺知樞密院事兼叅知政事

自禮部尚

書除

紹熙元年正月以尊號冊寶加通議大夫

丙申周必大罷相

自少保左丞相益國公罷為觀文殿大學士判潭州

制曰三孤洪化允資弼亮之謨十國為連更賴蕃宣之略任雖隨於內外寵不異於始終爰即昕庭誕敷

丕號

具官周必大

量宏而識遠德鉅而材全文高黼黻之

華學富經綸之妙忠勤體國孜孜而無不為通敏濟

時綽綽乎有餘裕繫天下之重望結慈宸之深知預
大政而秉洪樞迭司二柄繇次相而登上宰光輔兩
朝舜傳有助於詒謀益贊克禋於繼治肆升亞保增
峻元台股肱良而庶事康方觀成效紀綱張而衆目
舉甫立宏規俄遽露於需章願亟還於印諭旨丁寧
而莫奪陳情堅確而弗移既雅志之重違在茂恩而
宜厚是用付以長沙之巨屏俾作牧於上游寵以書
殿之大名仍通班於左棘罔替眷懷之渥式昭體貌
之優進退有光觀瞻咸聳於戲作舟楫汝用惜不爲
於朕留毋金玉爾音尚素殫於我告勉祇 明訓益

懋外庸

必大自淳熙十四年二月拜右丞相十六年正
月拜左丞相是年五月罷入相二年餘○時右
諫議大夫何澹論奏左丞相周必大不公平不平
不正之罪有十伏望亟賜罷斥詔周必大弼諧
初政求去甚力已除觀文殿大學士判潭州殿
中侍御史范處義復奏欲望因其辭免特從所
乞併罷職任以少保奉祠歸里從之紹熙元年
十月以少保充醴泉觀使益國公周必大判隆
興府二年正月留正奏周必大再以祠請上曰

必大堅不肯出此果何意正奏或爲當時言者
尚在未敢輕出今與除職奉祠又恐或招人言
胡晉臣言祖宗時前宰相在外奉祠未有不帶
職者上曰俟郊禮後旋議除職乃所以保全之
七月除觀文殿學士判潭州三年三月復觀文
殿大學士寧宗卽位除少傅醴泉觀使益國公
少傅制曰朕祗膺駿命寅紹丕圖舊弼偃藩甫遂內
祠之佚霈恩進律爰升亞傅之崇乃輯群工用孚渙
號具官周道隆而德備實茂而聲閱自有書契以來
悉能該綜首以詞章之選入踐清華西掖北門周旋

累歲高文大冊震耀四方逮參秉於事樞肆進專於
國柄謀謨經遠任社稷以不疑精神折衝撫華夷而
咸肅久辭相印起殿帥垣乃爲綠野之游自適東山
之志眷冲人之嗣服方歌求助之詩想元老以興懷
嘗下乞言之詔茲頒異數就陟孤卿夏篆通壇班浸
高於左棘袞衣赤舄禮增煥於三槐仍衍故封併加
真食於戲嘆股肱之美庸加二公洪化之名進藥石
之規式究致君澤民之蘊尚孚明命毋有遐心

紹熙元年 庚戌

七月甲寅葛邲叅知政事

自宣奉大夫同知樞密院事除

胡晉臣端明殿學士簽書樞密院事

自太中大夫給事中兼侍讀除

王藺樞密院使

院自知樞密院事除

乙卯留正左丞相

自宣奉大夫右丞相遷金紫光祿大夫除

制曰朕紹承丕緒躬覽萬機朝廷以正百官允賴表

儀之建人主之論一相允嘉輔翼之勤維時鴻碩之

才積有弼諧之效肆疇重望載陟上台播錫制緡亶

孚朝路留具官性端而識邁志廓而量夷奧學逢原究

賢哲經綸之蘊英猷致遠達古今平治之方自膺慈

極之深知徧躡中朝之華買出則顙臨於藩閫入則

參掌於鈞樞維石之具民瞻踵登次輔飛龍之位天

德首賴成摹暨浸閱於歲年朶究勤於朝夕氓編輯

穆邊瑣晏清以脩百度則職業畢興以劬三農則雨

暘咸若有嘉乃績宜服予息是用榮持魁柄之崇就

領冢司之重代天理物圖成無改於前規佐王均邦

顙任弥高於列辟仍行圭畚之富申陪封戶之真峻

迺文階懋茲徽渥併從輿望式示眷懷於戲為政而

執其中朕每恪遵於舜命作相而置諸左爾思永靖

於商邦既能先正乎心術之微故克盡合乎公道之

美勉祗丕訓益底茂勳

正授左丞相兼監修國史提舉編類聖政時右

相虛位公屢以爲請上曰古者多任一相今方
責成於卿宜體朕意公與同列奏事後殿上謂
公等可各具當今爲治先務數條來上公上疏
陳五事上深納之多所採用八月進呈安奉壽
皇玉牒日歷積階授特進先是是年春奏事留
身乞建儲上曰且待商量後累入奏上雖納公
奏未果從也二年冬上以心氣不豫未能視朝
時外議洶洶公與同列間至

福寧殿奏事

入則具言朝廷無事以安上心出則報行得旨
合處分事與中外除目以安人情歲則辛亥蓋

初郊之季也十二月公爵進封申國公三年三
月上病寢平公懇祈歸政上力留公臺臣亦合
辭奏言近者聖躬憊豫留某維持紀綱忠勤備
至今陛下初御內殿幾務方繁非宰臣求去之
時乞宣諭公俾安相位遂不得請十二月進呈
安奉壽皇聖政授公少保衛國公累辭而後受
四年有李端友者以椒房之親內批除郎公以
御筆繳還上不納公執奏不奉詔遂納之御榻
而退三月以葛邲爲右丞相四月有旨召姜特
立公言唐憲宗時李絳不與吐突承璀共立於

朝特立向知閣門事日臣爲右相嘗列其招權之狀特立奉祠而去已經四年今既召還臣合罷相與李絳一同遂居家待罪越七日不報遂出國門乞解機政奏言陛下近年不知誰獻把定之說遂至每事堅執斷不可回臣居家八日出門三日並皆不報此把定之說誤陛下也云云復不報乃次范村僧舍自是徂冬凡五閱月上寤遂寢特立之召公生日遣中使持詔賜生餼如儀於是壽聖皇太后年登八袞群臣請上尊號曰壽聖隆慈備福將以冬至恭上冊寶詔

以公爲禮儀使攝太傅令宰屬諭旨使者相望趣公以歸入見上大喜凡累月有疑而未決之事數日施行殆盡是日車駕過北宮時雪隨應

以冊寶禮成授公少傅進封魯國公

林大中狀其行

少傅制曰宅百揆以奮庸莫重上台之任立三孤而

洪化載崇亞傅之聯朕肇纂丕圖恭修庶政既趣還

於大老爰特畀於隆恩錫以緝格於公聽具官器深

識遠才鉅量宏博極群書賁古今而有用迪知九德

參上下以盡誠繁機久試於登庸成績具宣於燮理

自持魁柄久罄忠謨勤勞先四近之班進退凜大臣

之節瞻巖石之峻方推師尹之賢歸衮衣之華彌著
我公之懿屬當臨御之始尤賴經綸之長堯舜陳於
王前固無非道蕭曹乎安海內寔在同心百度期於
畢修衆職資於總領念倚毗之滋厚豈褒陟之可稽
是用升宗左棘之班仍宅冢司之任篆車加賁庸新
朝路之儀茅社增光併衍戶租之賦茲符僉議匪曰
私恩於戲左右得其人方藉調娛之助居處必以禮
尚殫輔贊之勤繫在元臣詎煩深詔

五年正月葛邲去位時孝宗服藥上以病未能
省覲公與知樞密院事趙公汝愚等日以爲言

五月戊辰孝宗疾勢日亟公與同列求對侍從
臺諫隨入殿庭力請過宮上拂衣起公引上裾
泣諫同列及侍從臺諫從至福寧殿門上亟還
內公退上疏極論今日亡國之事其大有四皆
人所不敢言者六月戊戌孝宗升遐癸卯大斂
百官在廷俟候成服車駕未至中外洵甚公與
同列謀請太皇太后垂簾奏知壽皇之喪不可
無主祝文稱孝子嗣皇帝宰相不可代行乞降
旨立皇子嘉王爲皇太子權監軍國事代行祭
奠之禮太皇太后不肯出與同列屢乞奏事不

報乃入奏乞立嘉王爲皇太子言臣等伏見近日中外人情不安輿訛造謗無所不有臣等朝夕思所以爲鎮壓之計莫先於重國本宜早正儲位以安人心又奏擬指揮乞御筆批依付學士院降詔施行奉御批八字公與同列卽再請對不報乃復奏言立儲事不可緩望睿明獨斷速賜施行至是奏凡四上不報公卽出國門上表乞致仕其末曰願陛下速回淵鑒追悟前非漸收渙散之人心庶保靈長之國祚識者知公惓惓之忠也越二日太皇太后命皇子嘉王卽

位於重華宮尊皇帝爲太上皇帝以公爲大行攢宮總護使○初公主議謂上皇以疾不能主大行皇帝之喪宜端默三年立皇子嘉王爲皇太子權監軍國事若終喪後上皇未有倦勤之意則當復明辟如議內禪則皇太子可卽皇帝位旣而趙公汝愚欲因左司郎徐誼尚書郎葉適遣韓侂胄通巨璫張宗尹關禮使以內禪奏請於太皇太后公謂建儲降詔之命未下而遽及此情禮未安兩宮父子之間他時有難處者議論不合入奏復不報遂力求去及太皇太后

命上卽位上頓首固辭太皇太后令內侍扶掖上出簾以黃袍加聖躬上遜避願爲趙公汝愚曰恐負不孝之名群臣再三祈請上却位移時而不坐其後侍郎鄭是言陛下自臨御以來不以天位爲樂而以未見兩宮爲憂中外皆知陛下本心非利於有天下然上皇之心猶有未釋然者是以陛下未得盡子道也又言仁祖初建東宮不以爲喜而以不得日侍帝后左右爲憂今陛下踰年於此矣而問安視膳之敬猶未獲伸諒聖情思慕之切當又甚於仁祖上納其奏

愀然久之蓋公之所慮者在是也○先是孝宗

大漸謂太皇太后曰宰相須是留某不可輕易

寧宗卽位入謝太皇太后曰公公在日只知重

留丞相聞已去可速宣押乃賜札御入庾牌遞遣

內侍二負水陸並進召公且令所至勸進公卽

同使者入見賀上初登天位誠爲宗廟社稷計

上曰方賴協贊以起治功是時上居行宮主大

行皇帝之喪公請車駕一出慰都人之心定壽

康宮於南內撤去所增禁旅以安中外悉從公

奏也輔臣皆次遷授公少傅公控辭不拜章五

六上復言國步多艱壽皇厭代升遐上皇抱疾
 不出太皇太后因立陛下以安宗社陛下勉狗
 群情以登大寶正宜遇事從簡示天下以不得
 已之意然後可以立國誠非頒行封爵之時上
 從公請狀

十二月乙酉王藺罷樞密使

藺自淳熙十六年正月除叅知政事五月除知
 樞密院事是年七月拜樞密使是月罷執政幾
 二年御史中丞何澹言中外喧傳樞密使王藺
 之弟萊知池州貴池縣暴狠不法凌蔑州郡郡

守張金乞行迴避語併及藺詔王萊降一官放
 罷而藺亦乞奉外祠從之三年四月通奉大夫
 提舉洞霄宮王藺奏以臣憂病之浸乞收還除
 職帥蜀恩命遂與職名依舊宮觀先是王藺降
 充資政殿學士至是復觀文殿學士尋又降充
 端明殿學士四年三月除知江陵府寧宗即位
 除資政殿大學士知潭州

丁亥葛邲知樞密院事

自叅知政事除

胡晉臣叅知政事兼同知樞密院事

自端明殿學士簽書樞密院事

除

三年六月癸卯晉臣免兼同知從所請也

紹熙三年壬子

六月辛丑陳騃同知樞密事自禮部尚書除

騃字叔進台州人

紹熙四年癸丑

三月辛巳葛邲右丞相自光祿大夫知樞密院事遷特進除

制曰朕纂紹皇圖宣昭聖治深惟輔弼之任當盡忠

誠之謀爰簡蓋臣要先心術之正俾司宰柄寔贊政

幾之繁肆擢自於元樞沆奮熙於百揆誕揚制綽顯

告廷紳葛邲官博大忱恂靖恭純裕學該行備居循宣

哲之規識遠用宏動契經權之會粵繇實茂寢展謨

明稔殫政路之勞陞總事機之祕副予隆委逮此累

時嘉素蘊之既摠允具瞻之攸屬茲懋經於邦典適

崇建於台司宥密而單厥心聿觀成績彌縫而藏諸

用允藉宏猷是用釋本兵之權居次輔之位俾同寅

於朝廟期納誨於夙宵仍文階采邑之增示厚禮薇

息之備於戲觀左右惟人之誼固在於協心思旦夕

承辟之勤勿忘於勵志無輕去就以共圖於治効庶

幾休顯而克邁於前賢尚服訓言式對褒命

同日胡晉臣知樞密院事自參知政事除

陳駉參知政事

自同知樞密院事除樞

是年七月通議大夫知樞密院事胡晉臣致仕

尋卒贈金紫光祿大夫資政殿大學士致仕告

詞畧曰天賦純誠世推厚德仁者必勇立朝多

蹇諤之風正而不他致主盡忠清之節謚文靖

同日趙汝愚同知樞密院事

自吏部尚書除

制曰西漢以同姓疏封不在公卿之位東平以至親

輔政厥由聲望之隆惟我本朝尤厚皇族始則優加

祿爵曾弗任於外廷後雖並用親賢亦無踰於法從

茲開宥府蓋得宗英

具趙汝愚

官派出天潢望高國器

早隨寒雋首冠於儒科出在蕃宣久臨於蜀部侍經

帝幄選士貢闈皆故事之所無在爾身而兼備爰以

樞極之寄託之肺腑之親必有若人乃堪大任匪固

私於異渥將深慰於公言噫開國以來未有今日非

常之寄本兵至重當展平生有用之才以增磐石之

之光以壯維城之勢

樓鑰詞

汝愚字子直開封祥符縣人太宗皇帝元子漢

王元佐八世孫祖申公不求自南渡來嘗監饒

之餘干酒稅後遂家焉乾道二年汝愚以鎖試

奏名孝宗親擢為第一○紹熙四年以吏部尚

書知貢舉公之爲吏部尚書也當光宗卽位之三年因郊感疾而五日一朝之禮少輟至誕節冬至車駕皆不過重華宮公對便殿極誠諷諫光宗開悟獨懼孝宗意或不樂乃諭公先以此意奏稟重華公舊以宗姓與嗣秀王伯圭善乃力請嗣王調護兩宮於是兩宮之情遂通光宗迺率中宮俱詣重華從容終日都人大悅是月遂除同知樞密院事狀行○方公自蜀召還也孝宗內禪之議已決聖意盖有所屬而殿中侍御史范處義忌之甫入脩門而不果入公嘗

以本朝名臣議論自建隆以來迄於靖康以類編次後成三百卷遂奏請擇其中尤切於治道者爲百五十卷上之孝宗嘗諭宰臣周必大等曰治道盡在此矣洎公進登樞筦故事詣重華官方叙謝孝宗曰卿以宗室之賢爲執政乃國家盛事卿在蜀時所進奏議極好朕嘗謂此書可與資治通鑑並行故嘗易名其書爲治道集蓋用孝宗獎之語也同上○監察御史汪義端奏臣伏見以降聖旨趙汝愚除同知樞密院事此國朝典故所未嘗有也臣詳攷得宗室之不爲

執政祖宗法度守此至嚴原始初之立意決不
苟然者是以中興會要具載紹興六年正月內
高宗皇帝聖語有曰唐用宗室爲宰相本朝宗
室雖有賢才不過侍從而止乃所以安全之也
又具載紹興十四年十一月內宰執進呈乞以
軍器監子厚暫權吏部侍郎宰臣秦檜有曰今
日宗室所宜崇獎令聚於朝高宗聖語有曰宗
室之賢孝如曾中科第及不生是非之人可
置行列如寺監祕書省皆可處之祖宗以來不
用宗室作宰相其慮甚遠可用至侍從而止大

哉聖謨昭如日星正今日所宜謹守而不可渝雖
以壽聖皇帝雄略遠馭立賢無方唯才是用唯
於擢用宗室則一守高宗聖訓未嘗處之以爲
執政也用宗室爲執政尤失防微之意陛下所
以用汝愚者豈以其曾爲大魁有異於其他宗
室故特越常彛而用之歟臣謂科目高下亦出
於一時偶然耳祖宗典故乃一切不暇問無乃
酬之大甚而予之大過乎崇寧間有子崧者禮
部奏名爲第一賜進士出身除從事郎職官差
遣是亦有科名矣宣和間爲侍從以忠言忤權

貴出知淮寧府適當靖康京都之變慷慨誓起諸道勤王師以復虜讎堅守淮寧迄保境土親爲書數千百言以責僞楚張邦昌及姦臣徐秉哲等遂翊高宗以中興高宗當擾攘之時而遂任以本兵之柄其誰曰不可然而不過一除爲徽猷學士再除爲端明殿學士而止夫子崧之科名豈不少類於汝愚而忠義功勞則過之高宗未嘗除爲政執聖慮可謂甚遠不報義端更不赴臺供職遂除爲軍器監義端辭詔與郡錄初公之知貢舉也時監察御史汪義端爲參詳

官險薄專橫好爲異論公每抑之故公同知密院也公方援高宗聖訓控辭而義端挾貢闈私憾論公新除不當光宗爲遷義端列寺少卿而給事黃公裳復論義端罷之公愈不安凡十三疏力辭光宗於是謀之孝宗乃宣諭宰執令召當筆學士申諭朕意明言高宗聖訓所以沮秦檜之姦謀故詔語有云若乃紹興之故實蓋有爲而言况我壽皇之疇咨欲播告於衆蓋述兩宮之意也公自初除閱二十六日始拜命行狀

七月壬午趙汝愚知樞密院事自中大夫同知樞密院事除仍進封開國

公五年七月己巳兼參知政事

制曰朕延登樞臣方務親賢之並用擢專兵本豈以日月而為功式隆磐石之宗益聳維嚴之望具官趙汝愚僊源有自天分素高發之以場屋之聲名博之以師友之問學論思禁路有真爭臣之風鎮撫藩方著古循吏之績望之堂堂折而不撓元齡孜孜知無不為卓爾士夫之間居然公輔之器頃為儲案已知許國之忠茲貳機庭尤見愛君之篤俾陞宥府之長密贊中宸之謀增行真腹併昭異數噫三軍五兵之問雖未至於朝堂一日萬幾之繁正有資於帷幄朕方越

拘攣而圖任爾其勉忠力以赴功惟既厥心同底於

治樓鑰十一月慈福宮冊禮畢轉太中大夫

制曰迺十有一月癸未日南至朕帥中宮從以婦子朝於重華獲陪親尊上顯號於王母惟一朝四世非常之休則亦二三股肱克相孝治以輯盛儀可無茂恩昭示褒律具官趙汝愚任重而道遠經明而行修瞻言累朝篤叙同姓然自熙寧以進士對策而卿始以謹議冠群英自治平以儒臣本兵而卿始以雅望位三事卓爾不群百年而後見之朕甚嘉焉屬茲成禮盍圖爾功維昔太任儀刑姜妣功在十亂德在二南於是

周公推本徽音作思齊之詩以歌之而仲尼定爲六藝傳信萬世朕今逮事過於成王繫卿特書不在周公之下疇勞進秩實應經誼噫繼自今卿其家人陪朕歲上萬年之觴顧不偉歟

陳傳良詞

公在樞庭每進對詞婉而切彌縫甚至大抵多主調護雖同列所陳不無扞格及聞公奏聖情卽悟屢有翻然夙駕之意不幸間言易入作而復輟五年五月孝宗疾勢浸劇光宗方御後殿丞相留公正率同列力請過宮不從明日留公等待罪光宗有旨宰執並出於是俱出浙江亭

俟命而留公徑至六和塔孝宗聞之憂甚使論宰執入城且有始終扶持之語公等乃復歸第六月戊戌夜孝宗大漸光宗旣不出延見大臣宰執不得已退率百官詣重華宮發喪是時人情洶洶中外阻絕無所用力公遂與中書謀請憲聖垂簾權主喪事憲聖問知有典故始傳旨令朝廷施行是日乃成服於時事勢危迫思所以計安天下無若建儲公與宰執同入劄子請早定儲位以安人心不報再請乃付出批云甚好公再乞御筆下學士院降詔但付出御批歷

事歲久念欲退閑八字自是連日繼請降詔之命竟不下數日復奏而牘尾有御批留公大沮七月辛酉朝臨忽踣地退治去計先是孝宗疾勢彌留京口諸軍妄疑朝廷祕不發喪欲相率編素向闕遠近惶惑至是建儲之請既格而留公又欲引去公自度不得辭其責乃亟謀贊成內禪之舉公嘗與殿帥郭杲論京口事知杲忠實可共謀國事獨患未能達意於杲使備宿衛間工部尚書趙彥逾嘗有德於杲公亟使言之杲欣然聽命公卽折東報留公措置已定願少

留不聽留公夜潛去由是人心益搖時慈福宮內侍張宗尹與閣門韓侂胄善厚公乃使侂胄以內禪之議附宗尹入奏憲聖憲聖宣諭令公且耐煩公心知憲聖有主張意明日再遣侂胄復申前請侂胄又令宗尹附奏亦竟不得要領適遇提舉重華宮關禮嘗父事孝宗禮問知公意令侂胄少俟卽入泣告憲聖以趙知院亦有欲去之意憲聖大悟遂命關禮傳旨令侂胄諭公所請甚好甲子禪祭因請憲聖垂簾公與同列奏言請皇子嘉王可卽皇帝位尊皇帝爲太上

皇帝憲聖稱善時關禮先以憲聖命請上入簾下憲聖勸上卽位上稽首固辭憲聖命內侍扶掖出簾屢以黃袍加聖躬上屢却之顧謂公曰恐負不孝之名公曰天子當以安社稷定國家爲孝今萬一有變亂卒起當置太上於何地陛下尚得爲孝乎上被黃袍却去不坐公率同列再拜稱賀乃引殿帥郭杲步帥闕仲入賀杲仲先退如祖宗故事分兵宿衛南北內少頃上詣几筵燒香哭盡哀行禮久之公等再三祈請上始就御坐百官起居退親行禫祭之禮頃刻之

間群情欣慰中外俱定先宗內出禫位手詔丙寅大赦天下始孝宗違豫上下憂懼與訛造訛異議沸騰褒陽有歸正人潛謀爲變者若非聞赦解散必大貽朝廷之憂於是人益知內禫之舉爲不可緩云是月權參知政事行狀○公之遷知院事也以車駕久不至北內及武興吳梃物故未有主帥日久憂懼堅辭不拜時朝廷將以長至奉上慈福冊寶而左丞相留公正以論姜特立待命於郊累月不召右丞葛公邲又方被論請去中書進擬差禮儀使先宗面命公爲之

公對冊禮重事故皆以宰臣為使今陛下捨兩丞相而用臣恐事體太輕非陛下嚴奉祖后之意乞於兩丞相中選差一人光宗許差留公公即請降旨差中使宣押及遣宰屬往諭旨且請冊禮前先詣重華於是留公復相長至前五日車駕過宮都人大悅冊祀成有旨趣召公受告公復奏曰稽違恩命臣罪大矣然能用臣言臣敢不拜今陛下忌過宮留正已復相惟是武興久不置帥恐貽朝廷西顧之憂陛下除帥臣即受告不命敢復辭光宗欣然許之公乃拜命竟以

張詔代領武興之軍

余端禮同知樞密院事

自通議大夫吏部尚書除

端禮字處恭龍游人

紹興五年 甲寅

正月葛邲罷右丞相

授觀文殿大學士依前特進判建康府

制曰咨股肱於揆路寔司庶政之權付管鑰於陪都式藉重臣之望惟時近弼久位中朝茲祈解於繁機肆出膺於隆委誕敷制綍敷告廷紳具官邲迪行忱恂賦資溫粹早遇光華之治浸預秘謀雅輸輔翼之勤

尤嘉舊德逮遍更於二府爰顯陟於中台休休有容

本務彌縫而藏用謙謙自牧乃希明哲以保身雖疊
聞議者之言顧敢替相臣之禮勉留備至懇退彌堅
朕審其累奏之莫回念其在公之盡瘁用頒宸指俾
釋宰司書殿隆名班特高於儒學帥藩要地任增重
於居留體貌斯全眷懷惟厚於戲觀納誨之益置諸
右以具宜思告猷之忠順於外而勿怠其承予命徃

集爾庸

邠自紹熙四年三月拜右丞相是年正月罷入
相不及一年時聖體違豫諫官章穎論葛邠疏
十餘上俱不報至是遂罷相判建康府尋改授

隆興府寧宗卽位下求言之詔自觀文殿大學
士醴泉觀使除保信軍節度使開府儀同三司
後以贈少師寧武軍節度使衛國公致仕配饗
光宗廟庭

綱年錄

卷之十九

三

宋宰輔編年錄卷之十九終

